

**Terdapat Potensi Besar Dalam Perdagangan Antara Malaysia Dan Pakistan -  
Mukhriz  
Bernama  
13 September , 2011**

KUALA LUMPUR, 13 Sept (Bernama) -- Terdapat potensi besar yang belum dimanfaatkan untuk meningkatkan perdagangan dua hala antara Malaysia dan Pakistan, kata Timbalan Menteri Perdagangan Antarabangsa dan Industri Datuk Mukhriz Mahathir.

Beliau berkata perdagangan dan pelaburan antara kedua-dua negara masih agak rendah dengan dagangan berterusan hanya dalam jajaran produk yang kecil.

"Peranan sektor swasta juga sangat penting dalam melaksanakan rangka kerja perdagangan dan pelaburan yang diatur oleh kedua-dua kerajaan," katanya pada pelancaran Forum Perniagaan Pakistan-Malaysia, di sini, Selasa.

Mukhriz berkata penggalakan perdagangan juga memainkan peranan dalam menarik pelaburan dan meningkatkan eksport serta import.

"Malaysia dan Pakistan sentiasa mengekalkan hubungan dua hala yang rapat, dengan perdagangan memainkan peranan utama dalam hubungan ini.

"Titik perubahan dalam pembabitan dua hala kita ialah permeterian Perjanjian Perkongsian Ekonomi Rapat Malaysia-Pakistan (MPCEPA) pada 2007, yang berkuat kuasa secara rasmi pada 1 Januari, 2008," katanya.

Mukhriz berkata sejak pelaksanaan MPCEPA pada 2008, perdagangan dua hala meningkat dengan kukuh, dengan jumlah perdagangan berkembang sebanyak 133 peratus daripada RM3.42 bilion pada 2006 kepada RM7.99 bilion, tahun lepas.

"Eksport Malaysia ke Pakistan berjumlah RM7.52 bilion tahun lepas, mewakili kenaikan 31.3 peratus.

"Malaysia, yang merupakan destinasi eksport ke-25 terbesar dan sumber import ke-5 terbesar Pakistan, pada 2010 mengimport barangan bernilai RM475.9 juta berbanding RM525.8 juta sebelumnya," katanya.

Beliau juga berkata bagi tempoh enam bulan pertama tahun ini, jumlah perdagangan antara kedua-dua negara bernilai RM4 bilion, pertumbuhan 11.7 peratus daripada tempoh yang sama, tahun lepas.

"Aliran meningkat ini dijangka berterusan tahun ke tahun, dalam eksport dan juga import," katanya.

Eksport utama Malaysia ke Pakistan termasuk minyak sawit, produk kimia, produk elektrik dan elektronik, serta tekstil dan pakaian.

Sementara itu, Malaysia mengimport terutamanya tekstil dan pakaian, sayur-sayuran, makanan laut, beras, kimia dan bahan kimia.

Dari segi pelaburan langsung asing, Mukhriz berkata Pakistan berada di kedudukan ke-19 tahun lepas dari segi pelaburan dilulus dalam sektor pembuatan.

"Pada Mei 2011, pelaburan dilulus bernilai RM1.096 bilion dalam 25 projek, terutamanya dalam kertas, pencetakan dan penerbitan, pembuatan makanan, tekstil dan produk tekstil, kulit dan produk kulit, dan produk saintifik serta pengukuran.

"Sementara itu pelaburan dari Malaysia ke Pakistan berjumlah RM2.6 bilion pada 2010, terutamanya dalam pembangunan prasarana dan pembinaan, cari gali petroleum dan tenaga," katanya.

--BERNAMA

Hakcipta© 2011 BERNAMA

Source:<http://www.bernama.com/bernama/v5/bm/newsbusiness.php?id=613107>